



UPA 2015/103
12. marts 2014
Múte B. Egede

Siunnersuut uunga: Katersugaasiveqarnek pillugu Inatsisartut inatsisaat.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Nunatsinni kulturikkut pisoorsuuvugut pisuussutigullu illersortuarlugillu eriagisariaqarpagut.

Inuit Ataqatigiit kulturerput anersaakkullu inuuneq inuiattut nukittoqqutitta pingaarnerit ilaattut isigaat. Kulturikkut pisuussutigut siulitta ukiorpasuarni ineriartortissimasaat uatsinnullu ingerlateqqitaat eriagalugit tammatsaaliorlugillu aaqqissuussinissarput pisussaaffigisariaqarparput pingaarutilik.

Inatsisissatut siunnersuutip siunertaa pingaarneq, tassalu kulturikkut eriagisassat tigussaangitsut, eriagisassat tigussaasut assigalugit inatsisitigut illersugaalernissaat pillugu siunnersuut Inuit Ataqatigiinniit taperserumavarput. Nuannaarutigarpullu susassaartunit pingaartinneqarlutik illersugaalernissaat timitalerneqarnialeremat.

Kulturikkut eriagisassat tigussaangitsut ilaat eqqaassagaanni makkuupput: Qaannoriaaseq, nerisaqariaaserput, ileqqorsuutigut soorlu qilaatersorneq, oqaluttuariaaserput, pinngortitap pissusaanik ilisimasat, atisalioriaatsit soorlu kalaallisuuilorneq il.il.

Taagorneqartut tassaapput inuiattut naleqartitagut ukiorpasuarnilu nunatsinni inuuniarnitsinni nukittoqqutigisagut. Naleqartitatta tammatsaalineqarnissaat kinguaariinnilu ilisimaneqarlutik ingerlaqqinnissaat pingaaruteqarpoq, inuiattummi kinaassutsitsinnut pingaaruteqarmata.

Kulturikkut eriagisassat tigussaangitsut inuussutissarsiornerikkut soorlu takornariaqarnerikkut atorluarsinnaaneramat aamma periarfissat ilagivaat. Inuimmi kulturerput inuiannut allanut misigisassarsialugu inuussutissarsiuutigisinnaanera soqutigineqarluarlunilu misigineqarusussasoq takorlooruminarmat.

Inatsisissatut siunnersuutip imarisaa tamakkerluni eqqartorneqarluarlunilu suliarilluarneqarniassamat, Kultureqarnermut Ilinniartitaanermullu Ataatsimiititaliami suliarineqarnissaa innersuupparput.

Ataatsimiititaliami inatsisissap suliarinera iluatsillugu uku ilannguttariaqarsoraagut:

Eriagisassat tigussaasut inoqarfinni inuunermi inuussutissarsiornermilu akornutaalersimagaangata akornutaasup aaqqinnissaanut inatsimmi anilliarfissaanik peqalernissaa ataatsimiititaliap sulinermini ilanngussinnaagaa innersuussutigarpuput. Assersuutit tigussaasut marluk taaneqarsinnaapput:

Akunnaami tunisassiorfitoqqap illutaa eriagisassaamat allilerinissamat nutarterinissamullu piumassuseqartoqaraluartoq inatsisit aporfilersuinerat.

Assersuut alla tassaavoq nunalerinermi annertusaaniarnermi pingaartumik qallunaatsiaqarfikut aporfilersuisinnaasarneri.

Ilanngullugu innersuussutigarputtaaq illut eriagisassat nakkutigineqarneranut akisussaaffik annertoq maanna sumiiffinni katersugaasiviit akisussaaffigisaat nalilersoqqinneqassasoq.

Akisussaaffik illunut eriagiasassanut tunngasoq sumiikkuni pissusissamisoornerunersoq nalilersuinermi ilanngunneqassasoq kaammattuutigaarput.
(Múte Bourup Egede, Inatsisartuni ilaasortaq, Inuit Ataqatigiit)